

სსიპ - ივანე ჯავახიშვილის სახელობის თბილისის სახელმწიფო უნივერსიტეტის რექტორის/რექტორის მოვალეობის შემსრულებლის არჩევნების ჩატარების პროცედურა

მუხლი 1. ზოგადი დებულებები

1. სსიპ - ივანე ჯავახიშვილის სახელობის თბილისის სახელმწიფო უნივერსიტეტის (შემდგომში - „უნივერსიტეტი“) რექტორის/რექტორის მოვალეობის შემსრულებლის არჩევნების ჩატარების პროცედურა (შემდგომში - „პროცედურა“) ადგენს ხმის მიცემის პროცედურის, არჩევნების შედეგების შეჯამების, საარჩევნო პროცედურაზე დაკვირვებისა და შედეგების გამოქვეყნების პროცედურას.
2. რექტორის/რექტორის მოვალეობის შემსრულებლის თანამდებობის დაკავების წესი და პროცედურა განისაზღვრება „უმაღლესი განათლების შესახებ“ საქართველოს კანონის, უნივერსიტეტის წესდების, სხვა ნორმატიული, ასევე უნივერსიტეტის შიდასამართლებრივი აქტებითა და წინამდებარე პროცედურით.
3. გარდა წინამდებარე პროცედურაში მოცემული საკითხებისა, რექტორის/რექტორის მოვალეობის შემსრულებლის თანამდებობის დაკავებასთან დაკავშირებული სხვა საკითხები განისაზღვრება მოქმედი კანონმდებლობით დადგენილი წესით.

მუხლი 2. კანდიდატთა რეგისტრაცია

1. კანდიდატთა რეგისტრაციის პერიოდი განისაზღვრება აკადემიური საბჭოს ინდივიდუალური ადმინისტრაციულ-სამართლებრივი აქტით. რეგისტრაციაზე უარის თქმის შემთხვევაში კანდიდატი უფლებამოსილია ხარვეზი გამოასწოროს 1 დღის განმავლობაში.
2. კანდიდატი უფლებამოსილია რეგისტრაციაზე უარი გაასაჩივროს გაცნობიდან 1 დღის განმავლობაში. საჩივართან დაკავშირებით გადაწყვეტილებას საარჩევნო კომისია იღებს 1 დღის განმავლობაში.

მუხლი 3. საარჩევნო პროცედურა

1. კენჭისყრის პროცესის განხორციელების ადგილს, მისი დაწყებისა და საარჩევნო უბნის დახურვის დროს ადგენს საარჩევნო კომისია, რის შესახებაც ინფორმაციას აქვეყნებს საჯაროდ.
2. საარჩევნო ბიულეტენის ფორმას ამტკიცებს საარჩევნო კომისია.
3. აკადემიური საბჭოს წევრის მიერ ხმის მიცემა ხორციელდება საარჩევნო ბიულეტენზე სათანადო აღნიშვნით და საარჩევნო ბიულეტენის საარჩევნო ყუთში მოთავსებით.
4. საარჩევნო ბიულეტენზე აღინიშნება:
 - ა) უნივერსიტეტის სახელწოდება;
 - ბ) საარჩევნო კანდიდატების ჩამონათვალი.
5. საარჩევნო ბიულეტენი გაიცემა ამომრჩეველზე მხოლოდ შესაბამისი დამადასტურებელი დოკუმენტის წარდგენის შემთხვევაში.
6. არჩევნების დღეს აკადემიური საბჭოს წევრი ამომრჩეველი საარჩევნო კომისიის რეგისტრატორისგან იღებს შესაბამის საარჩევნო ბიულეტენს, რასაც ადასტურებს ამომრჩეველთა სიაში მისი გვარის გასწვრივ ხელმოწერით. ამის შემდეგ ამომრჩეველი

მიდის ხელმომწერ კომისიის წევრთან, რომელიც საარჩევნო ბიულეტენის შესაბამის გრაფაში აწერს ხელს. შემდეგ ამომრჩეველი შედის სპეციალურად მოწყობილ საარჩევნო კაბინაში და მას შემდეგ, რაც წრიულად შემოხაზავს მისთვის სასურველი კანდიდატის სიით ნომერს, ათავსებს შესაბამის კონვერტში და აგდებს საარჩევნო ბიულეტენს საარჩევნო ყუთში. კაბინად შეიძლება ჩაითვალოს აგრეთვე ნებისმიერი განცალკევებული ადგილი, სადაც ხმის მიცემის ფარულობა დაცული იქნება.

მუხლი 4. შედეგების შეჯამება

1. კენჭისყრის დასრულების შემდეგ საარჩევნო კომისიის წევრები ითვლიან საარჩევნო სიებში ხელმომწერების მიხედვით არჩევნებზე გამოცხადებულ ამომრჩეველთა რაოდენობას, რაც ფიქსირდება შესაბამის შემაჯამებელ ოქმში, რომელშიც აისახება არჩევნებში მონაწილე ყველა კანდიდატის მიერ მიღებული ხმების რაოდენობა.
2. არჩევნები ჩატარებულად ჩაითვლება თუ მასში მონაწილეობა მიიღო აკადემიური საბჭოს წევრების სიითი შემადგენლობის ნახევარზე მეტმა.
3. არჩევნებზე გამოცხადებულ ამომრჩეველთა რაოდენობის დათვლის შემდეგ იხსნება საარჩევნო ყუთი და კომისიის წევრები ითვლიან საარჩევნო ბიულეტენებს.
4. საარჩევნო ბიულეტენი ბათილია, თუ:
 - ა) არ აღმოჩნდა საარჩევნო ბიულეტენზე ხელმომწერი კომისიის წევრის ხელმოწერა;
 - ბ) თუ არ არის შემოხაზული არც ერთი კანდიდატურა;
 - გ) თუ შემოხაზულია ერთზე მეტი კანდიდატურა;
 - დ) თუ შეუძლებელია გაირკვეს, რომელ კანდიდატს მისცა ხმა ამომრჩეველმა.
5. ხმების დათვლისთანავე ივსება შემაჯამებელი ოქმი, რომელშიც შეიტანება შემდეგი მონაცემები:
 - ა) ამომრჩეველთა რაოდენობა სიის მიხედვით;
 - ბ) არჩევნებზე გამოცხადებულ ამომრჩეველთა რაოდენობა საარჩევნო სიაში ამომრჩეველთა ხელმომწერების მიხედვით;
 - გ) საარჩევნო ყუთში აღმოჩენილი საარჩევნო ბიულეტენების საერთო რაოდენობა;
 - დ) თითოეული კანდიდატის მიერ მოპოვებული ხმების რაოდენობა;
 - ე) კომისიის ყველა წევრის ხელმოწერა.

მუხლი 5. დამკვირვებელი

1. საარჩევნო პროცესზე დაკვირვების მიზნით ფიზიკური და იურიდიული პირები უფლებამოსილნი არიან არჩევნების წინა დღის 15⁰⁰ საათამდე მიმართონ დაწესებულების საარჩევნო კომისიას დამკვირვებლის სტატუსის მოსაპოვებლად.
2. იურიდიული პირი საარჩევნო პროცესის დამკვირვებლის სტატუსს განახორციელებს მისი წარმომადგენლის მეშვეობით, რომელთა ვინაობა მიეთითება დამკვირვებლის სტატუსის მოსაპოვებლად წარდგენილ განცხადებაში.
3. პირი არ დაიშვება დამკვირვებლად, თუ იგი არის:
 - ა) ასარჩევი კანდიდატი;
 - ბ) უნივერსიტეტის ადმინისტრაციული პერსონალი;
4. დამკვირვებელი უფლებამოსილია დაესწროს საარჩევნო კომისიის მუშაობას არჩევნების დღეს და საჩივრის განხილვის პროცესში. დარღვევის აღმოჩენის შემთხვევაში მიუთითოს კომისიის თავმჯდომარეს და მოითხოვოს დარღვევის აღკვეთა.

5. დამკვირვებელი ვალდებულია ხელი არ შეუშალოს არჩევნების ჩატარებას.
6. საარჩევნო კომისიები ვალდებულნი არიან ხელი არ შეუშალონ დამკვირვებელს.

მუხლი 6. დარღვევის ოქმი

არჩევნების დღეს ამ დადგენილებით განსაზღვრული წესის დარღვევის გამოვლენის შემთხვევაში კანდიდატი, დამკვირვებელი ან საარჩევნო კომისიის წევრი უფლებამოსილია შეადგინოს დარღვევის ოქმი, რომელშიც მიეთითება:

- ა) ოქმის შემდგენი პირის სახელი, გვარი, მისამართი;
- ბ) ოქმის შემდგენი პირის სტატუსი;
- გ) დარღვევის შინაარსი;
- დ) დარღვევის დაფიქსირების დრო;
- ე) საარჩევნო კომისიის თავმჯდომარის ხელმოწერა ან აღნიშვნა მის ხელმოწერაზე უარის თქმის შესახებ;
- ვ) ოქმის შემდგენი პირის მოთხოვნა;
- ზ) ოქმის შემდგენი პირის ხელმოწერა.

მუხლი 7. შედეგების გამოცხადება

არჩევნების შედეგები ცხადდება არჩევნების დღეს, არა უგვიანეს 23:00 საათისა. საარჩევნო კომისია ვალდებულია ყველასათვის ხელმისაწვდომ ადგილას გამოაკრას არჩევნების შედეგების აქტი.

მუხლი 8. საბოლოო შედეგების გამოქვეყნება

1. საარჩევნო კომისია არჩევნების შედეგებს ამტკიცებს შემაჯამებელი ოქმით.
2. არჩევნების საბოლოო შედეგები ძალაში შედის გამოქვეყნებისთანავე.

მუხლი 9. დასკვნითი დებულებები

საარჩევნო კომისია უფლებამოსილია დაარეგულიროს წინამდებარე პროცედურით გათვალისწინებული სხვა საკითხები.